



# Հուսիկ Արա

## Կարոտ

Դու իմ աշխարհն էիր, որ արդեն վրիպել եմ.  
Իմ գիշերները վաղուց են առանց քո երազների:

Չանգերն են դողանջում դանդաղ ու թույլ-թույլ,  
և ես հեռացող ոտնահետքերի ցավն եմ զգում,  
որ կրնկում են մարմնիս մեջ:

Աշնան նոսր երկնքում  
չվող թռչունների թևեր են՝ երամ-երամ.  
կարապի երգն եմ հասկանում ջրերի վրա՝  
մեկ անգամ, որ վերջին անգամն է:

Կտոր-կտոր է անում սիրտս հիմա  
ամեն հեռացող բան.  
մի քիչ դանդաղ գնա,  
ճանապարհդ շատ է հոգնել իմ մեջ:

Կարոտն է կաթում գանգամաշկիս նույն կետին՝  
համաչափ տկկոցով ու ծակող սառն է.  
այդպես մահապատիժ են իրագործում  
չգիտեմ որ անտեր երկրում.  
Ի՛նչ ստույգ են աչքերը քեզնից նայող հոգեվարքի:

Դու իմ մեջ այնքան շատ ես,

որքան ոչ մի տեղ չես.

և ես ամեն մանրուք պահպանում եմ զգույշ՝  
հանկարծ մաս չպակասի ամբողջից,  
ու երբեմն էլ շոյում եմ մարմինս դողով,  
որ դու ես ամբողջովին:

Կարոտի մունետիկն եմ մոլոր,  
որ մեր կյանքի փողոցներում  
կանչում է՝ սեր կա, կա՛ սերը,  
բայց չի տեսնում և ընտրում է միշտ սխալ:

Քո աստեղային դիպվածն էի ես,  
որ վրիպեցիր օրերի մեջ: